

Inatsisartut suleriaasianni § 37, imm. 1 naapertorlugu, matumuuna Naalakkersuisunut imaattunik apeqquteqarpunga:

Naalakkersuisunut apeqqutit:

1. Naalakkersuisut qaqugu naatsorsuutigaat illunut sanaqataaffiusunut (medbyggersæt) pillugit nalunaarut pisariaqartinneqartoq tamakkerlugu atuutilersinneqassasoq?
2. Massakkut illut qanoq amerlatigisut illunut sanaqataaffiusussanut (medbyggersæt-itut) atorneqarsinnaasutut qanoq ittuuneranik akuersissutigineqareersimappat?
3. Naalakkersuisut qaqugu naatsorsuutigaat innuttaasut aaqqissuussinermut naapertuuttumik illunut sanaqataaffiusunut (medbyggersæt-imut) qinnuteqarsinnaalissasut aammalu akuersissummik pisinnaalissasut?
4. Naalakkersuisut nassuiaasinnaappat sooq aaqqissuussineq sulit atuutilersinneqarsimannginnersoq, aningaasat aningaasanut inatsisikkut immikkoortinneqareeraluartut?
5. Naalakkersuisut nassuiaasinnaappat illunut sanaqataaffiusunut (medbyggersæt-imut) aningaasaliissutit kommuninit ikilisinneqarsimanersut imaluunniit allamut nuunneqarsimanersut?
6. Inatsisartut aalajangiineranniit innuttaasut qassit illunut sanaqataaffiusunut (medbyggersæt-imut) qinnuteqarsimappat, qassillu akuersissummik tunineqarsimappat?
7. Naalakkersuisut uppersarsinnaavaat Sikublok atorlugu sanaartornissamut akuersissuteqartoqarsinnaasoq, aammalu taamaappat tamanna qaqugu piviusunngortinneqarsinnaanersoq?
8. Naalakkersuisut innuttaasut illoqarfinni mikinerusuni, nunaqarfinni aammalu nuna immikkoortuini avinngarusimasuni piaarnerpaamik illunut sanaqataaffiusunut (medbyggersæt-imut) periarfissaqalersinnaanissaat qulakkeerniarlugu suliniutit suut tigussaasut aallartinniarpaat?

(Inatsisartunut ilaasortaq Jens NapätôK', Naleraq)

Tunngavilersuutit:

Inatsisartut siusinnerusukkut illunut sanaqataaffiusunut (medbyggersæt) pillugit aaqqissuussinermut aningaasaliissuteqarsimapput, innuttaasut namminneq illuliorsinnaanerannik pitsaanerusumik

periarfissaqartinneqarnissaat siunertaralugu. Aaqqissuussinerup siunertaa tassaavoq illuliornissamut periarfissat eqaannerusut aammalu akileraarfigineqarsinnaanerusut pilersinneqarnissaat – pingaartumik illoqarfinni mikinerusuni, nunaqarfinni aammalu nuna immikkoortuini avinngarusimasuni, illut amigaataanerat sumiiffinni amerlasuuni annertuumik ajornartorsiutaareermat, aammalu illunik nutaanik sanaartornissamut periarfissat killeqareermata.

Inatsisartut aalajangiinerat aammalu aningaasat immikkoortinneqareeraluartut, sulii annertuumik nalornisoqarpoq aaqqissuussineq piviusumik atuunnersoq pillugu.

Nalorninartoqartillugu nalunaarutip tunngavissaa pillugu, illut suut akuersissutigineqarsimanersut, aammalu innuttaasut illunut sanaqataaffiusunut (medbyggersæt-imut) qinnuteqarsinnaanersut imaluunniit akuersisummik pisinnaanersut pillugu.

Aaqqissuussineq sulii tamakkerlugu atuutilersinneqarsimanngippat, tamanna Naalakkersuisunut Inatsisartut aalajangiinerannik qanoq malitseqartitsisimanerat pillugu apeqqusiivoq. Aningaasanut inatsimmi aningaasaliineq naamanngilaq, taakkua kingorna innuttaasunut periarfissanik tigussaasunik pilersitsinermut atorineqanngippata.

Pingaartumik innuttaasut illoqarfinni mikinerusuni, nunaqarfinni aammalu nuna immikkoortuini avinngarusimasuni najugaqartut eqqugaqqinnissaat aarlerinarsinnaavoq, aaqqissuussineq piviusumik atorineqarsinnaanngippat. Sumiiffiit taakku illuliornissamut aaqqissuussinernik eqaannerusunik pisariaqartitsinerpaapput, ilaqutariit ataasiakkaallu namminneq akilersinnaasamik illuliorsinnaanerannut periarfissiisumik.

Taamaattumik Naalakkersuisut aaqqissuussinerup atuutilersinneqarnissaanut killiffik pillugu erseqqissumik nassuiaateqarnissaat pisariaqartinneqarpoq, tassunga ilanngullugit suliaq sumut killinnersoq, illut suut akuersissutigineqarsimanersut, aammalu innuttaasut qaqugu aaqqissuussinermut piviusumik periarfissaqalissanersut. Taamatuttaaq pingaaruteqarpoq paasiniarneqarnissaa sanaartornermi periaatsit atortullu allat - assersuutigalugu Sikublok - aaqqissuussinermi atorineqarsinnaanersut.

Apeqqutigineqartut ullut suliffiusut qulit (10) iluanni allakkatigut akineqareersimanissaat piumasarineqarpoq. Oqaatsinik nutserisimanermi paatsuungasoqassatillugu kalaallisut allassimasoq aallaavigineqassaaq.